

四庫全書

集部

欽定四庫全書

集部

五百家播芳大全文粹卷八

詳校官編修_臣謝振定

助教_臣常循覆勘

總校官編修_臣王燕緒

校對官中書_臣葉蘭

膳錄監生_臣任銜葵

欽定四庫全書

五百家播芳大全文粹卷八

宋 魏齊賢

葉 恭同輯

賀啟

師保

賀文太師啟

李成李

先膺策命入拜師臣三公惟人大厦有棟梁之任一相

處內四方如泰華之安天扶聖君人望元老歡樂精神
之會流通上下之情禮無與隆時所罕遇恭惟某官孕
靈岳秀配德坤元器深厚而有容道直方而不撓武足
以戡定亂畧文足以潤色聖謨可託大事則社稷之臣
不親細務則帝王之佐進人如己愛物以情碩畫嘉謨
撫寧以華夏陰功隱惠字感於神明故能業亮四朝身
兼五福出入將相幾四十年古今勲勞無一二輩屬真
人之嗣服攬庶事以圖新謂國軍禁令有未決之疑左

右輔弼皆後來之俊俾辭留鑰入造內朝集冠蓋於都門羅饗殮於候館衮衣已往難留洛水之舊邦皓首復來共識仁皇之真相龍光疊被衢路榮生於今熙河之餽餉甚艱遼夏之疆隅未復不足者九年之食已傷者百姓之財將冗而卒驕吏繁而員溢永賴著龜之舊德克開社稷之遠圖俯陪調鼎之司獨踐位槐之地壽考之美方邁德於汾陽禮樂之功更仰成於姬旦某素唯鄙昧久荷獎提台座熒煌悵披雲之在望駕蹤疲曳但

服駕以長鳴

賀秦太師啟

程公巽

伏觀詔制正月一日大慶殿朝賀受傳國八寶太尉冊
拜太師者仰止三朝之老尉為萬乘之師裂以山川世
昨之封崇以鈇鉞專征之器貴窮人爵克享天心古者
天子有七人之爭臣太師首三公而論道所以儀刑海
內輔導帝躬嚴朝廷則爵為達尊事德義則貴有所屈
成湯先學於伊尹必有所不召之臣穆公無人乎子思

不能安長者之側有來命世之哲以起非常之功恭惟
太師道濟彌綸文能經緯非予覺而誰也豈曰友之云乎
王曰嗚呼父師作祇命周公之冊予惟克邁乃訓繼舊
學甘盤之賢極名器則禮敬兼隆咨典刑則老成為重
就訪大事必先惇史之乞言俾乘安車參用黃門之設
几底於五典論厥九疇以鎮定如岩石之瞻以博厚若
阿衡之倚一國之巨室所慕為政不難天下之大老來
歸其子焉往用能制作禮樂頒度量於明堂宙亮聖明

受泰元之神策肇稱寶玉於赫稜容然而無競維人惟德其物昔有倚相能道訓典晉大夫失問於白珩子反善理兵戎秦使者改觀於和璧不有君子將焉倚毗洪惟熙洽盛治之聖朝相以瑰瑋光明之人傑光於史冊配君臣畢命之書載之聲詩詠崧高烝民之雅

賀劉太師啟

石敏若

帝制坦明誕布外朝之聽師垣峻極有嚴上宰之班極名數以稱格天之功隆禮貌以示尊賢之等名實之加

四達爵祿之報兩崇成命式字有生胥慶伏以神文廣
運若皋陶則見而知之聖武布昭舉伊尹不仁者遠矣
允若君臣之同德能致帝王之極功自古以然於今為
盛恭惟某官才貫三極智周萬微每見之於未形嘗行
其所無事道合聖賢之用舍身係社稷之安危天眷有
邦畀斯民之嘉靖帝選於衆越諸老以登賢作興於一
時之間超越於千載之上治成德備而百度理施博制
廣而四夷賓質之於詩書而有據告之於神明而無愧

嗣奉緝熙之典丕承燕翼之休協三代受命之符厚其
戩穀作八瑞鎮邦之寶登以端元方溟澤之均行豈鼎
司之可後肆頒顯冊承顧師言位著有光諧師臣之步
武陞廉加峻壯王國之奠安伏念某結約無奇閭閻少
予病樗何用亦叅萬國之春敝帚自珍孰辨千金之享
倘未亡於簪屨終有賴於錘鑪望履無階但想鷹揚之
表飾辭有腴仰伸燕賀之儀

賀丈太師啟

宋文淵

重膺顯策榮拜上公委軍國之深機奪丘園之至樂中
外胥慶神人以和矧衣被於恩涵豈雷同於夔伏伏惟
某官直方而大含容而光學為王者之師身任當世之
重出秉麾鉞入掌鈞衡堅一德而無二心弼四世而歷
三紀草木魚鱉以之而咸若陰陽天地以之而泰通功
成不居身退自遂於遯得無疑之利於漸為可用之儀
方大人之繼明思厚德以載物還以論道屬之經邦以
鎮安華夷之情以負荷廟朝之寄雖二帝上庠西序三

王左學東膠方漢事桓榮之尊魏優王祥之養姑記善
於惇史或乞言於暇時莫如進退之間獨係安危之大
昔望吾君如舜翻然起莘今欲天下一周老而歸魯當
簡策難傳之事業有丹青莫狀之輝光某夙範陶鈞生
全卵翼孤投塞壘遠總兵戎備斯役於無由望台光而
展慶神馳心結意在言殫

賀秦少保啟

汪彥章

伏頒明詔登用大儒疏榮三少之班正位百官之上生

成所及鼓舞斯同恭惟某官言合六經學包萬古由周
公傳之孔子獨承師友之淵源惟尹躬暨及於成湯邇
應君臣之期會久借本兵之重多輸納誨之忠方功名
未究於經綸舉中外皆形之歎息蓋文物於斯為盛欲
治平舍公其誰故除書甫降於九天而和氣遂充於四
海某早蒙知獎叨被使令逢恩寵之鼎新預生靈之鈞
播雖官聯在遠莫能陪多士之班然謠俗至公尚擬採
烝民之雅

賀秦少保啟

鄭敦夫

玉檢告成載篤中興之緒麻綸數旨茂昭夾輔之勲祇服寵靈亟躋寅亮臚傳所暨公論攸歸少保大觀文吾道宗工斯文先覺規模國器士業相門吐論皆前輩之風流落筆非後來之氣格飛英騰茂決科獨步於一時盡忠竭嘉致身橫飛於兩地贊廟謨而底定纂聖德以承休惟昔曩儀禮素隆於列辟矧時異數位宜進於二公未盡疇庸更陪行賦某自惟朽鈍素出甄陶盛事會

逢尚阻南州之小壘喜懷增劇莫隨東閣之後塵展慶
無從馳情惟切

宰相 左相

賀韓丞相啟

唐子西

顯奉制麻延登宰席播騰九有歡慶一時竊聞考元龜
以斷人謀不如舊德指喬木而稱故國未若世臣才猷
夙著於廟堂名實已隆於天下故社稷因之而倚重而
朝廷恃此以稽疑恭惟某官器量海涵精神玉粹天資

攸稟有仁民愛物之心家學所傳皆論道經邦之術藹
揚令聞坦涉亨途項任樞躔謀已深於漢帷出臨閭寄
澤大溥於商霖政地久虛僉言允屬值聖朝之嗣服思
輔相以迂衡召還三遷遂宅百揆韋平盛事固無愧於
古人房杜全功誠責全於今日必將盡發胸中之蘊庶
幾大慰海內之心某承乏遐陬側聞除目阻遠潭潭之
府莫趨兩兩之階叢扞寸誠難形尺牘

賀左丞相啟

李成季

拜命大庭分聯左揆天人相與君相並興千載一時永
契太平之會四方萬里共蒙生氣之和竊以舜帝舉皋
陶而竄不仁高宗命傳說以求古訓因先王而為政為
天下以得人竦佩遺風復見今日顧安危之所繫宜上
下之稱歡恭惟某官名世真儒生民先覺稟三才之氣
思則無邪以四海為心達則兼善智大必先於遠致行
高不可以小知未嘗枉己以直人豈憚屈身而伸道三
解不聽漢無干澤之私萬鍾何加惟有養恬之樂屬大

明之紹服講庶政以圖新急聞至言優禮元老以公議
而自處為衆人之不能匹夫未安深軫納溝之念至誠
獨立靡懷濡足之憂故進賢退惡而多士歸心興利去
害而庶民不議果膺睿渥叅秉鈞衡飛鴻之遇順風已
如夙志大旱而作霖雨咸賴我公益貽萬世之安永尚
一人之慶某猥叨憐遇倍切懼愉限守州符阻造台屏

賀趙丞相啟

張全真

伏審決定大策建中興不拔之基褒賞元勲正上宰久

虛之位王庭字號海隅交歡竊以赤舄袞衣美征東之
姬旦命圭相印答平蔡之裴公播在聲詩光於簡冊况
却憑陵之巨敵有開恢復之宏規示丕勸於羣工宜首
膺於異數恭惟某官直方而能守敦大而有容獻納論
思夙著排姦之節贊襄輔弼尤高經遠之謀惟光武能
推赤心而絳侯可屬大事會羽書之遽至奉革輅以徂
征師律一新坐據江山之險捷書屢上幾成京觀之封
致敵騎之宵奔本嘉猷之辰告射鵬賈勇雖異李廣之

無雙指喉收功誰出蕭何之第一宜頌宸綽首冠台躔
舍爵之賞既行歸疆之暮可待某述聞誕告喜越常情
昔忝同升謬託金蘭之契老思自放願諧丘壑之求頌
詠之私敷宣曷既

賀湯丞相啟

熊子復

伏審褒異真儒躡升元宰熙帝之載早並列於泰階東
國之鈞首進顯於魁柄經綸雖久潤澤維新恭惟平章
僕射相公毓粹昭回儲精峻極翔蛟龍躍虎鳳炳焉華

國之辭閉雷霆藏風雲渾然經世之度冠殊科而挺出
歷要路以橫飛勢不倚於冰山望自隆於岩石絳灌雖
毀不能使文帝之疑禹山既除宜首用弱翁之相粵從
樞筦躡正冢司彌縫萬機粉澤百度勒成曠典述丕顯
之文謨結好殊鄰示允懷之漢德崇儉以省國用唯公
以收人材果疇專美之功遂陟久虛之位身榮上衮心
協前修昔祖宗享國之長繫宰相得人之盛然天聖之
修真錄乃王文穆之持綱而慶厯之申遼盟乃呂文靖

之當軸節冗費則賈魏公首建其議抑親黨則章郇公
自守其謀雖舜帝之有五臣足誇當世然周公之施四
事並掩前人宜乎史臣彈簡牘而屢書文士極翰墨而
交頌况萬世遇大聖方垂拱而仰成於一代為宗臣每
彌縫而藏用浩若元氣運於太虛人莫測其端倪物陰
被其膏澤某早窺崇倪遠託洪鈞名則甚微半世選舉
而始得學雖不輟過時勤苦而難成倘蒙造物之憐獲
免抗塵之賤則專且筆札盡心力於斯文率作歌詩尚

形容於今日

賀蔣丞相啟

洪景伯

伏審還位中階進居首鉉簡在上帝夙膺柄國之專圖
任舊人起副具瞻之切郵傳四出廟筭一新竊以舜以
不得皋陶慮萬機之或壅湯則有若伊尹諒一德之相
依唯其實係安危於身故去猶失左右之手本朝為盛
前輩可稽趙韓王奪服於建隆之際式尊古誼富鄭公
牢辭於嘉祐之後第爵師虞蓋遭變事者務度其宜而

為忠臣在移其孝恭惟平章僕射相公蒼龜先覺柱石
壯猷應變成務而挺有祖風同寅協恭而甚稱上意如
丙吉之按邊瑣既預科條若崔相之除吏員更公薦舉
方任秉鈞之重遽罹陟屺之艱位雖去於岩廊眷益深
於黼黻肆舉奪情之典益疇佐命之勲家事雖勤詎可
辭於國事人心既悅宜遂格於天心豈但復於中臺仍
更陞於上衮况十事說天子已前定於規模則一代為
宗臣庶永扶於基業某猥貳九卿之列忝居百職之間

宜制於庭共儒紳之相慶立班於路迎相衮之來歸敢
再扣於崇墉輒自通於竿牘攘振弱植方依仙宇之摩
空纚紼輕帆或助神舟之濟海

賀劉丞相啟

劉夷和

榮膺策命進掌綸衡十行傳於置郵四海為之歌頌竊
以爰立之任從古所難宣帝中興之功惟丙與魏明皇
勵精之治非宋則姚吉流於儒而相失之嚴崇溺於權
而璟窘於用雖茂美績蓋非全才故明皇愧於守成而

宣帝甘於雜伯致君同堯舜之盛接步繼皋夔之賢
治本得人朝廷增重恭惟某官忠勤許國康濟乘時溯
游於道德之淵源潤色以詩書之華藻主上撫艱難之
運受重寄於祖宗大臣用康濟之資報異恩於君父屬
雅言而素定注上意以仰成天地鬼神神明其心鳥獸草
木均其賜某受知最厚念咎方深睹端揆之得賢喜宗
祧之蒙福夙興夜寐敢忘庇覆之恩飲水曲肱與享太
平之樂

賀左丞相啟

何子因

伏審誕告帝庭崇登宰席君臣一道夷夏均休恭以某
官天擁英才人資先覺神明運用足以官使有造之後
髦談笑發揮足以酬酢無形之事變叅元豐之法從冠
紹聖之詞林道德文章一世宗匠言議風采四方表儀
出處係天下之重輕卷舒為君子之消長起從琳館服
在岩廊夷考嘉猷峻躋揆路蓋聖賢之相得若旦暮之
可期豈思歲月之功始協雲龍之會故有虞選衆必屬

皋陶而湯后格天實資伊尹觀神考所以遺公於今日
之志與執事所以致忠於本朝之心方且振起頽綱葺
完舊典大備一王之制作追還三代之規模必使壞植
散羣紹閣休於先烈豈徒興滯補弊收近效於當年遂
格元勲益隆昌運是為天意豈獨人謀所以神感淵衷
潛發文王之夢帝思碩德式迎公旦之歸事映古今道
光簡策某詩書淺學口耳近功埽舍人之門未塞依歸
之願望平津之館空馳夙夜之心驩抃發中情誠並竭

賀左丞相啟

大庭作命揆路陞華鼎鉉不移首冠九官之右台符增
煥益隆四海之瞻某聞解琴瑟之絃所以正五音調鼎
鼈之實所以齊衆口蓋習治久安之弊而翫歲愒日之
多蟻穿弗填有潰堤決石之憂蔓草不圖為錯節盤根
之患悼折肱之已誤顧反掌而奚難戒覆車之轍則安
焉易敗者之暴則勝矣恭惟僕射相公受天大任為國
元臣屬當宁盱食之初承前人履鍊之後鍊五色之石
而欲試補天之手儲萬全之藥而共推醫國之功剔除
邦蠹而復睹清明救療民瘼而一消疲瘵丕冒維新之化
獨高再造之勲書郭中令之考而與國均休享衛武公
之年而與民偕樂頌言如此輿論所同某枯朽陳人伶
俦末路久託林居之陋側聞廷煥之傳倍深喜躍之情
實為知憐之素惟宰路布洪鈞之大每懷藜藿不採之
恩而神仙隔弱水之遙詎失鷄犬同升之望

賀葉丞相啟

熊子復

欽定四庫全書

五百家類纂大全文粹

十四

欽定四庫全書

五百家類纂大全文粹

十五

伏審宸衷圖舊廟筭倚平大老遄歸方總機廷之重真
儒柄用首躋鉉席之崇朝野具瞻華戎咸賴竊以舉直
而錯諸枉舜湯所以君萬邦舍藏而用則行孔顏所以
師百世既聖主察流言之害宜元臣當注意之隆破斧
而缺斨戕詎損周公之德濟川而作舟楫迄資傳說之
功恭惟平章僕射相公重任降天才高命世早膺親簡
徧歷從途封駁無私事必叅於典故銓擬有叙時更立
於章程逮進貳於彌綸果深裨於綜核位高衆忌日月
無得而踰道直自將風雨不改其度凡為暫聞於去國
介圭復見於來朝張良運籌已獨優於三傑魏相總職
宜首贊於萬機豈特輔重華協帝之勲正當究上策禦
戎之備苟政刑明於閒暇有要有倫則道德成乎安強
無侮無拂遠追景德祥符之烈近述熙寧元豐之謨某
早出門墻叨居省戶路車乘馬方瞻入覲之容衮衣繡
裳亟聽登庸之典既班庭而旅慶猥贊牘以寓誠庶慶
萬間已幸忭懽之庇洪鈞一氣尚希塊北之陶

賀趙丞相啟

毛穎伯

先奉制書進登揆席得力牧而先五帝克禋皇猷命傳
說而總百官大凝臣績璽書誕告輿頌交歡竊以災運
中微阨會偶丁於百六洪圖未艾咸登方繼於五三將
隆再造之勲必賴非常之佐帝思俾乂大拯橫流民其
爾瞻仰高岩石倘非過人之英傑孰隆不世之功名而
況敵騎縱橫常若風雨之疾師兵簡練久韜熊虎之威
宜獨制於中權用克清於邊燧師直為壯莫高狐偃之

謀唯斷乃成實繫裴度之用據兩朝之宿憤折萬里之
遐衝請命彤庭始僉同於九列申威紫塞遂震疊於四
夷大哉聖謨恢此賢業恭惟某官智周天宰學貫民彝
體君子之中庸蹈賢人之久大敦詩書而悅禮樂綽有
成謀定社稷而安國家自其素蘊凜乎天下之模楷蔚
為朝廷之羽儀荐更二府之榮獨任四方之責撥亂世
反之正徵斯人誰與歸簡在帝心授以魁柄運動樞極
法太微三光之庭振理綱維清文昌萬化之本式是百

辟格於皇天錫巨鬯以告文人召伯獻萬年之頌受彤
弓而揚休命晉侯陳三錫之儀勲德兼隆古今莫二某
腐孱陋質樸散材金馬石渠嘗簞行朝之表著銅魚
竹使自淪遠郡之簿書喜聞材館之開願備洪爐之託
麋頭鼠目難逃冰鑑之明馬勃牛溲或備藥籠之用

賀秦丞相啟

汪彥章

廷揚字號國拜元台有道而守四夷方懋中興之業職
要而論一相寧須夾輔之勲天意會同人心闡擇恭以

某官運逢真主志在生民聚精神帷幄之中絕體貌簪纓之上安危大計孰堪舉國而聽焉前後數公方見得君之專者積三載處中之望副九重虛左之求魁柄不移衮衣增煥方且收威權於王室示風采於敵人收河北一百餘州今其時矣書汾陽二十四考行且見之某久託洪鈞欣聞顯冊屬拘縻於乘障阻趨走於班庭歲籥將中廟堂多暇冀必鼎茵之節永為宗社之休

賀張丞相啟

鼎之道

恭審渙號大廷晉陞良弼宸衷簡注見擢用之得人國
勢尊榮知治安之有日伏審慶慰竊以君臣相遇古今
至難玩歲愒日則必悔於噬臍趨事赴功則每虞於掣
肘故時君克斷裴度所以成功而朝議多違羊祜不能如
意自非天意悔禍人謀允臧則何能用大度之言於以
啟中興之運恭惟某官奇才命世妙畧濟時洗日咸池
功素高於社稷捫參蜀道名已振於蠻夷雖更夷險之
殊不替終始之遇屬傳羽檄趨下鋒車復正位於鈞衡

乃撫師於疆場運籌帷幄而決勝於千里致巨敵之宵
奔端委廟堂而為準於百僚副輿人之夙望實惟圖舊
何止策勲伊尹一德以享天心無間然矣漢高五載而
成帝業尚竊遲之益堅帶礪之盟增煥鼎鍾之勒某辱
知最久贊善尤深閩海相從已熟衰殘之迹荆溪休老
願諧退縮之心頌詠之私名言罔既

賀左丞相啟

何文縝

伏審寵錫元勲誕敷明命顯躋峻秩超正上台凡在陶

鈞舉同抃慰恭惟某官高明純亮博大淵通器周文武
之宜道濟功名之會行其所學致身變稷之間迄用有
成躋俗唐虞之上方且增煥丕承之烈發明垂裕之功
廣學校以新人材睦宗枝以厚風化大備一王之制永
圖萬事之康分飭師干遠平蠻徼山川失其險阻冠帶
被於遐荒文治既優武功復暢蓋裴度有平蔡之烈不
能致治於太平魏相推佐漢之名尚愧弗通於征伐載
惟成績獨掩前人某早以庸虛厚蒙眷獎方成器使阻

造公門懽頌之誠敷宣罔既

賀魏丞相啟

孫仲益

伏審發冊疇庸揚庭布號懋佐王之學必有漢閣麒麟
之勲開元弼之祥果應渭水熊羆之兆恭惟某官受天
大任躋世中興方當四十強仕之秋已展九萬垂天之
羽恢遠大經邦之畧極於四遐運沉深先物之幾妙於
百中金甌獻卜芝檢䟽榮於天下宰一新文昌萬化之
源以人中傑迥出漢庭諸臣之右便從黑頭歷郭令中

書之考直至黃髮給孔光靈壽之扶如某者老境蹉跎
窮途栖屑墮井誰敢救而又下石焉餘燼寧復然猶有
溺灰者卒賴造膝一言之重俾出填溝九殞之餘洪惟
此恩何以論報側聆誕告尤激懼悚實副卿大夫百執之
具瞻豈止愚不肖一夫之私喜

賀左丞相啟

邵公濟

伏審誕膺顯冊進秉鈞衡朝野流傳廟社增重恭惟某
官勲庸載在王室道德格於皇天持海上之節來歸白

首而典屬國起渭水之濱入輔黃髮而亮武王功蓋一時名著百世恥君不及堯舜茲茂著於嘉猷常愧恨無蕭曹遂無關於聖慮行見鞭笞四夷而禦侮庶幾振舉百度以仰成輿論所期斯言可必某侵尋暮齒託備藩維自愧無奇遂占陽城催科之考庶幾他日及見鄭公仁義之行

賀湯丞相啟

黃伯淵

顯被絲綸寵還機軸節彼重瞻於岩石炳然載仰於台

符禮絕百僚歡傳四極恭惟某官乾坤間氣社稷元勲
依兩朝日月之光慶千載雲龍之會坐鎮雅俗江左謂
之風流名播遠夷天下係乎輕重方當宁力圖於恢復
豈岩廊久輟於經綸雖周人無以我公之歸然謝傅當
從蒼生而起以授機破敵固難測於謝安而草詔指蹤
將獨決於德裕爰制難於千里之外將信威於兩河之
間敵已在夫目中治可運之掌上某欽聞顯命喜溢單
襟遠馳燕厦之誠緬想鳳池之峻變調多暇氣序寔清

願精鼎餗之調式副簪紳之望

賀湯丞相啟

宋仲山

對敬宸冊登用冢司依兩朝日月之光華得千載風雲之感會龜鼎增固朝野寢和恭惟僕射樞密相公德根天淵忠衛社稷翼游雷而出震霈霖雨以濟商進膺虛左之求深聳處中之望蓋袞職有闕惟仲山甫能補之若世事極談管夷吾無憂矣故威望獨重於他相而風采益動於遠夷揭機柄而不移煥台躔而愈耀用真儒無敵

天下遂有若周公之功約諸侯先入關中必能堅高祖
之意中興可待遠業攸歸某久託洪鈞欣聆顯命屬遠
縻之使指仍阻綴於賀班九列無堪固難入翹材之館
三書欲上願將登光範之門抃躍之私敷陳罔既

賀張丞相啟

林豈塵

欽膺宸冊進陟台衡聳岩石而具四海之瞻秉洪鈞而
為萬物之播平章雖舊渙汗惟新恭惟僕射都督相公
道德正傳天降大任作傳野之霖以蘇厥旱洗虞淵之

日而夾以飛方從鳩閣以重登詎許鳳池之久奪風操
可記想不忘嘉正之名沉厚有謀蓋惟恐東山之老況
關中賴蕭何而鎮撫於天下繫裴度之重輕當秉君子
大有為之時能辦羣臣不可及之事歷中書二十四考
其在於今復兩河三百餘州可立而待某跂聆顯命喜
集重衿以青天白日而知其清明惟春風夏雨而出於
造化依炎州而羈迹望光範以馳情相印命珪雖阻桃
林之賀雕戈錫盾願賡淮蔡之歌

賀陳丞相啟

洪景伯

伏審蔽自淵衷寵還魁柄敵人南下運籌思漢傑之才
丞相西來奠枕慰周京之望敵情未戰而先阻師氣不
作而自強竊以大寒而索衣裘雖失禦戎之備巨川而
作舟楫豈無濟世之才是故雍熙河北交兵而趙忠獻
復踐於首台康定陝西用武而呂文靖再登於元宰玩
四夷猶兒戲爾迄底咸寧仰二公若神人然詎令專美方
戎馬犯邊而孔棘洎冢司虛位以誰籌事有致難類拯

溺救焚之舉人惟求舊屬扶顛持危之才恭惟少保僕射相公一代真儒兩朝元老皋陶盛德見堯舜而知之蕭何大功與閔散而爭矣如非煙祥風而物被緣飾若青天白日而人知清明方慈闈之倚平值邊烽之告警首顓廟筭用堂上之奇兵坐攻敵營起舟中之敵國逮相重華而協帝悉將衆美而效君具隆岩石之瞻勇遂急流之退大臣惟郭令身獨繫乎安危外國於晉公使每詢其用否適丁多故允賴壯猷詔札使軺繼催入覲

命圭相袞仍卽外除遂荒東魯之封併本西樞之柄方
將駕馭諸帥無飛揚跋扈之雄總領羣公有輔贊彌縫
之用庶幾復文武之境土豈但捷秦楚之甲兵某夙賴
洪鈞聳傳華渚岩廊揆策方圖開闢之勲清廟薦詩願
竭揄揚之思

賀左丞相啟

汪聖錫

伏審播告大庭晉登上宰峻班儀於左棘首揆路於中
臺四夷聳聞九鼎增重伏惟某官賢推名世道富經邦

獄降神而生申實維周翰帝賚粥而得說用作商霖變
故屢更精忠彌著掃除內亂高五龍夾日之勲攘却外
虞成一馬渡江之業方輔寧於法駕將經畧於神州貝
錦遽興扁舟輕去屬分江而置帥乃鐵鉞以臨戎羽扇
綸巾已坐清於氛稜命圭相印蓋疊賞於元功矧獨兼
文武之資宜並注安危之意逮聞虛位果趨賜環非衣
之謗何傷有袞之思咸屬顧乃心王室喜魁柄之重歸
而戮力中原佇皇家之再造天時有待物望攸同某滯

迹一涯神馳數仞聆制麻而相慶曾無瘴海之殊引賓
履以交趨獨嘆翹材之阻其如瞻頌莫盡名言

賀丞相啟

沈清臣

八年政府軍國之效昭然一日宰司天人之心允若惟
相有作繫時所尊蓋上天不肯隱默以生成雖人主不
敢急輕於付與遙求既往率開厥先意令舉世以心知
庶使居位而人服或反拔木之風以彰其任德之實或
生同穎之禾而告以共政之符或肖形象而求於巖穴

之間或假卜筮而取以漁釣之內聳以甚神之迹壓夫
至衆之情處臣鄰之極而天下莫敢望焉得夷夏之悅
而賢者然後安此至若興王之佐欲為經世之圖每致
嚴於始進之時直有待於衆定而出處莘郊非三聘而
莫起卧草廬必屢顧而後興居東山者甘蟠屈以俟其
逢遇黃石者亦徘徊以觀其志落落風雲之會寥寥歲
月之傳謂居元首之股肱實係黎獻之耳目聽爾衆言
之可否卜吾國勢之輕重宜茲授受之兩艱良恐信服

之不易欽惟二月之廷制冊拜一朝之宰臣聖皇專御
殿以致禮貌之殊宮禁急授麻以揚功業之盛百辟肅
恭而俯聽班行私語而說文忠萬姓踴躍以歡傳走卒
齊聲而稱司馬士子以主盟之有賴爭濡毫以草慶厯
之歌詩裔夷以夙昔之所聞每遇使而問晉公之年紀
是何普天之下洋洋而有喜色蓋由在位之久事事而
合衆心自初睿主之隆興即仰真儒之特起一紀雍容
於從橐歷年端委於廟堂二十六載之施設雖由聖斷

千百萬言之啟沃孰若公多始以文章而發帝業之光
中以鯁亮而主國論之是偉矣敢言之氣卓然難進之
風規模已定於前時聞望豈惟於今日追伊張葛謝之
出處起大名於乾道之先奮皋夔禹稷之事功當重任
於淳熙之後而况湛然之清識更尤超爾於人羣視富
貴以無心顧萬鍾何加於我堅持守之有道雖一介不
取於人惟踐履行今世之甚難故敬畏非餘人之可比
孰不履地望隆獨重於泰山如彼觀天目覩唯尊於列

宿以人心歸向而為輔弼以歲時積久而茂功名首開闢
於治源力扶持於公道舉措動遵於成憲發揮皆自於
聖謨三事徧更萬務畢舉頃叅持於國柄辨章斷斷以
惟平暨專鎮於使權績效昭昭而益著逆折敵人之氣
至令戎馬之遁逃盡消狂士之謀坐使邊陲之安靜世
已行者皆久長之至計日深究者多致遠之良圖作礪
之金愈練而愈精乘國之航愈操而愈固豐功塞乎天
地之大貴名揭乎日月之高其效若斯不相何待彼昔

賢厥初而欲行已志故多遲疑於向背之間惟我公已
試而深得衆情宜茲鼓舞於除拜之日天心克享無煩
影響以示人君意式孚不假勤渠而詔下於皇盛事盡
掩前聞恭惟丞相佐時聖皇齊古碩輔求諸典籍居相
位者不為無人究厥勲庸如門下者能有幾數唯宗社
遺無疆之慶故皇家得不世之賢矧光前事業居多而
於今名位克稱倬彼雲漢既忻滿月之瞻譬如北辰
共快魁台之指咸顧得天而久照殆將與國以同休其

夙被陶成今逢時至念納溝之失所恩已載於言前倘
在野以旁招願不移於人後

右相

賀朱丞相啟

汪彥章

宣布策書寵還魁柄昔周公未復頗遭四國之流言今
裴令來歸當使兩河之聽命天下相慶朝廷益尊恭惟
某官望絕縉紳勲書彝鼎學博而知要明古今治亂之
原才全而不形得天地中和之氣昨屬羣凶之擾允資

一相之謀禍泯胚胎變消肘腋蓋厥初同德惟尹躬之
暨湯果於變成功安劉氏而必勃越從分陝久輟贊元
帝憂堂陞之勢凌人恨衮衣之歸晚方將多事疇協濟
於蕭規宜我老成首光膺於說命再幹洪鈞之化一新
岩石之瞻某早屬眷知欣聞登用屬拘攣於印紱阻趨拜
於門墻歲律戒寒岩廊多暇冀謹寢饗之節永為宗社
之休

賀朱丞相啟

鄭載仲

聿膺大策進拜元台慶本朝之得人想中興之有日傳
聞四海驩喜一新恭惟某官覺在民先行為世表罄忠
嘉而許國懋勲業以格天大纛高牙暫寄九江之屏翰
繡裳赤舄適司大化之鈞衡出入係皇圖之重輕猷為
實蒼生之性命斡旋大柄熙然春天下之秋恢復中原
廓爾泰邦家之否行其素蘊副此具瞻某逖守郡符阻
趨台鼎永言欣頌實倍等倫

賀湯丞相啟

熊子復

伏審嗣皇圖舊真相秉鈞當食而嘆蕭曹既倚宗臣之
重制挺而捷秦楚何憂敵國之強休聲不約而皆同和
氣非召而自至竊考本朝宰司之故事有若先正沂公
之迭為天聖初來既踐昭文首台之位景祐再入乃屈
集賢次輔之居雖官職之小殊而相業之益盛矧惟今
日度越前人恭惟平章僕射相公驚代鍾才際天蘊識
初心道德必期整頓於乾坤餘事文章尚堪黼黻於河
漢夙佐光堯之治寔隆復古之勲中暫去於廟堂旋即

歸於帷幄北伐張仲在矣內既委於居留東郊君陳往
哉外更煩於綏撫適際飛龍之造亟興甘雨之思召自
燕閒還居翊亮仲虺相湯為左昔正登庸召公主陝而
西今同夾輔謀契沉幾之運益恢遠馭之圖任良將而
邊境必安拒壬人而蠻夷自服用續經邦之業仍收闢
國之勲某猥抗塵容逖瞻潭府簡書是畏自憐學術之
荒捶楚或辭尚託化鈞之播

賀梁丞相啟

林豈塵

伏審渙號楓宸奮庸槐位惟龍首八十而五得黃扉衣
鉢之傳今鳳厯二百有餘為清源桑梓之盛傾朝歌艷
載路游揚本遠業之攸先實中興之所係竊以黃帝得
六相各有使以為之治成周建三公不必備而惟其人
我皇朝舊制則襲隋唐僕射之名聖天子更化而復秦
漢丞相之號緊稱謂之鼎正在注想之深勤房杜之能
斷善謀惟深知而相濟姚宋之守文應變斯為治以同
歸聿圖承助之賢協運變調之化載颺新命式慰具瞻

恭惟某官道得正傳天畀大任褒然為首洋洋鼎董公
孫之言懋哉惟時濟濟稷契皋陶之選方爰立而置諸
右於當今所舍其誰履富貴之途而素所行處功名之
地以藏諸用聳岩石節彼南山之望列布衣儼然上衮
之榮對安輿而起居復見回班之禮扣閣門而闕白坐
聞宜祿之呼故事一新師言胥慶某側聆異數喜溢叢
衿雖溝渠無望於青雲然奴隸皆知其白日俸祿給於
衣食將不忘數年封侯自見之恩冠劍拂於塵埃敢竊

効三日待公奉酬之詠其為欣抃曷既敷陳

賀魏丞相啟代

熊子復

伏審妙簡前旒儼躋上袞論相為重久稽卜夢之求得
君既專亟峻鼎槐之任萬機有助百辟無譁竊以泰符
相比於天階宰職共持於國柄官不必備或曠歲以久
需人皆曰賢則崇朝而并拜仰稽昭代卓有宏模景德
之缺位累旬始同除於寇畢熙寧之虛席數月方對任
於王韓邈前後以罕聞亘古今而僅見恭惟平章僕射

相公自天降輔與世作程杖節申盟兵革靜五原之塞
揮毫演誥文章追三代之風逮登贊於經綸亦兼陪於
宥密詠天保采薇之什克佐永圖較神爵甘露之年聿
章成績果膺枚卜益副具瞻陳五利以和戎已繼家聲
於獻子同一心而輔政更追世績於弱翁庶臻復古之
勲茂建格天之業是為希曠孰與等倫某自攝使於都
畿乃為郎於省戶皆由恩紀未有報圖茲聆大號之揚
實倍常情之喜萬間廣廈已幸庇於忻懽一氣洪鈞尚

冀陶於塊圯

賀陳丞相啟

楊廷秀

登庸正人使宅次輔非難得宰相之位進賢則其國安
不必問太平之暮用公則其效敏天有所待世或未知
恭惟某官續洙泗以後之淵源追唐虞未遠之人物動
容貌以肅天下已皆趨風舉夷夏而安胸中了如觀火
召來兩地亦既三年所挾愈大而合愈難求去者堅而
留者衆觀其守道之如許不付之大事而其誰用之小

遲是以國人懷不滿之意試之既效然後明主有必信之心右席久虛君子是荷宜有遠畧用宏雋功治道無他止在一正君之妙學敵人易與終將九頓首於大庭某自知其迂敢速於售抱賈誼積薪之疏空有狂言哦少陵看鏡之詩真成半老獨恃知已不虛此生北道之秉洪鈞豈謂千齡之遇東閣之來衆彥未應一士之遺

賀右丞相啟

王宣子

伏審誕宣中制播告路朝褒言增袞繡之華進秩付魁

衡之重凡居陶冶罔不欣愉伏惟某官嵩華並高淵泉
含潤稽古之力純粹以精致君之心直方而大潛有上
前之啟沃發為天下之輝光丙魏扶本始之隆姚宋翼
開元之盛視猶一體相待而成雖曰二人同歸於治果
被都俞之命更升顯奕之階位冠凝丞功裨造化某屬
分符竹難望履綦顧頌詠以何勤豈編摩之可究

賀范丞相啟

秦少游

光奉明恩進陞右弼伏惟慶慰恭以某官器兼文武學

備天出入處係一時之安危議論為四海之輕重臨大
節而不奪雖小善之必為荀氏羣龍慈明為最河東諸
鳳伯褒尤奇投閑散而問望愈隆涉憂患而精神益壯
果濟世美簡在上心昔執鴻樞既致干戈之戢今居端
揆何難禮樂之興坦然衆正之路開行矣太平之責塞
某叨分符節辱在陶鎔陪班謁以無緣第承風而竊忤
賀右丞相啟

孫仲益

伏審褒進台司誕揚顯冊天祐一德唯尹暨湯運際千

齡生申及甫搢紳胥悅黎獻交歡恭惟僕射相公清明
冲淳剛毅沉塞親逢上聖服在邇途惟文昌萬化之源
上熙帝載而僕射百僚之長下竦民瞻果符夢齋之求
亟正鈞衡之拜溉七年之旱方資傳說之霖燠十日之
寒咸向趙衰之日治道清淨王路坦平聖心仰成國勢
增重某門牆舊物湖海餘生辱知感甚於脫驂聞命喜
深於折屐衣雖敝而可改常叨起廢之恩冠已挂而莫
彈但切歸榮之願

賀朱丞相啟

孫仲孟

玉冊疇庸金甌獻卜老成人在位朝廷自尊大賢者得
時善類交慶竊以履百年熙洽之運雖章句之儒坐守
而有餘當九重宵旰之憂則聖哲之臣馳驚而不足惟
時用舍實繫安危故委重何啻於萬鈞而幾微不容於
一髮視已陳之迹則因陋就寡烏足以有為建非常之
言則駭衆驚愚亦難於慮始班君奇策尚謂平平耿侯
大言猶為落落必盡破拘攣之議乃大收闕闕之功恭

惟僕射相公岩岩社稷之臣挺挺帝王之輔爰屬艱危之寄首膺攷詢之求深惟注意之隆實預扶衰之義崧岳周邦之翰獨專神柄之雄龜蒙魯國之瞻益壯坤輿之重不動聲氣斷大事於笑談之頃不作聰明運沉幾於禍福之先稽古道而思有宜於今合衆謀而不必出諸己茲謂中興之佐實為後事之師某頃備省曹嘗忝文柄窺絕足於羣龍之殿仰高明於千佛之經顧畿疆有百舍之遙詎門牆無一日之雅側聆誕告益竦遐瞻

屏迹窮閭顧莫下望塵之拜馳書東閣尚能修大事之
恭

賀蔣丞相啟

洪景伯

伏審嗣聖簡求真儒柄用官不必備久當機務之煩人
皆曰賢遂正鼎司之重仍併顯於宥密實盡付於經綸
朝野具瞻華夷允賴竊以思民被堯舜之澤伊尹自任
而不辭願我為管晏之功孟子當路而必恥惟輔相規
摹之既大則朝廷氣象之一新恭惟僕射樞密相公學

擅儒宗才推王佐入踐鑾坡而素優於潤色首陪岩廟而備極於贊襄如崔相之除吏員既公薦舉若丙吉之按邊瑣亦預科條果登正於宰司用增光於俎列況十事說天子早已見於責難則一代為宗臣即遂聞於專美某逖聆宣制猥絆乘輶阻陪賓客之趨曷勝寤寐之喜其如辭訥莫盡意誠

賀朱丞相啟

張全真

伏審大廷敷號舊弼登庸宿望昭宣慰蒼生之傾屬同

心翊戴拱黃屋以尊安中外懽愉華夷讐服竊兇重肝
食軫國步之迭遭四海疚心歎人謀之回適急於赴功
則攘臂以事兵力膠於應變則拱手以須天時類失厥
中無益於治宜得魁壘豪傑之士以為經綸康濟之圖
人固患於難知政莫先於任舊恭惟某官學窮道與識
探幾先德度恢宏撓汪汪之波而不濁才猷敏達游恢
恢之及而有餘曩警蹕之時巡倚鈞衡而爰立一德始
熙於帝載元凶遽亂於國經八柱承天即正高明之位

五龍夾日灼知潛授之功扶顛談笑之餘遠引江湖之上謗書一篋何傷丹宸之深知細札十行旋趨鋒車之入覲邇英晝訪宣室夜前衮衣繡裳既喜歸於姬旦命圭相印復加禮於裴公固應經畫於遠猷豈復規圖於近效裕民積粟以固基本詎專兵力之強嘗膽枕戈以修政刑亦戒天時之沴將見運籌帷幄以決勝於千里端委廟堂以為準於百僚沃心清燕之間拭目中興之盛某項陞從橐嘗蒙慰薦之私比解藩符復忝交承之

契仰止熒煌之座稱慶無階蕭然衰病之蹤依歸有所
祇聞新命喜倍常情

賀右丞相啟

蒲大受

伏審中頒紫詔載陟黃扉登用舊人交修庶政維帝攸
賚實民所瞻固有歡聲徧及率土恭惟某官望隆柱石
明照蒼龜以博通應變之才躋侍從於神考作新之日
以夷險不回之操參弼諧於泰陵紹述之時出入三朝
裁成百度欲踐繼志之實思聞補袞之言乃自江湖歸

叅帷幄尚謂密資於啟沃不若顯置於廟堂果敷綸言
克協衆聽君陳申命必多告后之猷千秋既封必有富
民之效某受知最久被德已深復以遲暮之年再託陶
鈞之地適居符竹阻造門闌不勝燕雀賀慶之心竊有
犬馬戀軒之志喜深載協望極增馳

賀右丞相啟

周行可

聿膺顯制進拜懋官伏惟慶慰恭以某官碩德渾剛忠
誠隱厚氣節堅乎金石功名著於鼎彝決應變之機上

所敬憚講順流之法民以乂寧江湖䟽道德之恩藻斧
明帝王之制邁我一德為時顯猷考諸朝野而有成功
謀之士庶而無異論是推茂典以答元勲岩扉靚深衮
服炳蔚式示具瞻之美足昭爰立之光某夙隸陶鎔遠
聆贊拜終更甚邇展慶有時踴躍懦衷倍萬常品、

元樞

賀丞相兼樞使啟

毛伯穎

冕旒發悟頒渙汗於九門繡袞來歸總樞機於二府協

朝僉之素望壯邊瑣之威謀用君子為邦家之基進善
人得天地之紀璽書誕告輿頌交欣竊以乘龍御天聖
主比隆於光武如魚有水元臣訂美於孔明昭然信順
之符盛矣明良之會昔敵騎襲淮壩之後屬鑒輿巡浙
右之初封豕長蛇肆毒尚憑於牧圉城狐社鼠嘯凶忽
起於蕭牆天步艱難人情睥睨強藩巨鎮莫敢誰何故
老元臣更相嘆息相公建義旗而糾合揮憤笏以激昂
首倡大謀盡夷羣醜廓清氛祲再垂日月之光膺受寵

榮大啟山河之誓方且念荆吳之形勢顧秦蜀之上游身
踐戎行宣憚櫛風而沐雨心存王室每懷就日而望雲
暴露五年憂勤一節流言起於二叔愈見周公之忠年
貌問於四夷難淹裴度之用果膺綸命再踐鼎司舊壁
壘而舊鼓旗得臨淮而增重錫弓矢而錫斧鉞獲踐土
以加優不日而成為天所贊恭惟某官柔惠且直昭明
有融學窮百代之淵源文貫六經之矩矱含章以從王
事許身無愧於伊周達可謂之天民致主每期於堯舜

議論必稽於皇極經綸悉本於帝謨致廣大而盡精微
獨造真儒之效總方畧而一統類乃凝哲輔之勲茲大
用於岩廊遂永清於海隅糾逖王慝既正崇街之誅誕
將天威遂通榆塞之阻戡夷多難者定中區告九廟之
神靈還兩宮之警衛龍樓問寢盡三朝孝養之歡鳳輦
還都受四海貢輸之富增煥雲臺之象遂陪日觀之封
赫然近古以來疇若我公之懿某周旋頗舊抃踴實深
桑榆雖迫於頽齡燕雀願栖於巨陰彈冠結綬尚陪光

範之簪裾抱慙懷鉞庶幾文昌之筆札

賀丞相兼樞使啟

方雲翼

顯膺茂冊兼領鴻樞冕旒之眷寵深隆簪紱之觀瞻益
竦聲傳飛驛喜浹遐陬竊以三公之尊政無不統二府
之設職乃有分秉國鈞則務在平章處機庭則獨司宥
密且文事武備之必有固宜合軍國於一權苟出將入
相之可為孰若注安危之兩意恭惟僕射樞使相公天
降大任道得正傳聳岩石而慰四海之瞻運洪鈞而為

萬物之播汝作舟楫汝作霖雨顧所用之何如視若手足視若腹心本相須而無間以人主之職而論乎一相故天子之守即在於四夷將資制敵之能特畀本兵之重運籌決勝高祖謂不如張良惟斷成功憲宗乃能用裴度中興可待遠業攸歸某辱在下風欣聞成命屬處南州之地遽陪東閣之趨且桃李無言緬想成蹊之舊燕雀至賤敢忘賀慶之情

賀吳樞使啟

汪彥章

光膺冊命進陟樞庭謀若著龜投千載功名之會心如
金石為兩朝社稷之臣當日月之繼明乘風雲而特起
國須賢立天為時生恭以某官厚德鎮淳英才經遠以
天地浩然之氣潛養於中於古今作者之文悉臻其表
爰見踐揚之始每勤獻納之忠立朝未及於中年舉世
推為於舊德昨屬殊鄰之擾上貽當宁之憂夕烽既徹
於甘泉清蹕將遊於汾水唯公夙夜與國存亡由侍從
之周行決纂成之大計方獨處雷霆之下有難言父子

之間雖黃屋非帝堯之心固宜及此然逆鱗在神龍之
頷誰敢撓之非二三秘策之前陳使百萬精兵而奚益
宜彼軍之喪膽知吾國之有人委曲請明逡巡退舍九
重根本得英公賢於長城四海生靈微管仲吾其左袵
方主上清明之今日實邦家希濶之昌期欲衆賢同逮
於事功非雅望孰爲於師表將萬世維持之是賴何一
時康濟之足言

賀韓樞使啟

汪彥章

光膺詔冊進陟機庭既廊廟之得人知朝廷之能國恭
惟某官清明藉甚雅望歸然四世五公門閥獨高於天
下十事九律計謀有補於國家徧揚清近之班深結聖
神之眷回翔滋久僉屬實勞惟豪傑之士無待而興難
稽經濟况公侯之家必復其始果被束求某早辱誤知
欣聞休命屬拘攣之印綬阻趨造於門墻暑令清微政
塗豐暇冀謹鼎茵之節永為宗社之休

賀呂樞使啟

歐陽永叔

顯膺寵典登進樞庭成命始行輿情允洽伏惟某官存
誠直諒蹈道中和學臻三代之英世濟八人之美論思
獻納已多補益之勤謨明弼諧久韞經綸之業三朝眷
遇一德老成尚虛黃閣之居姑正紫樞之位坐籌帷幄
方資制勝之謀正席釣台始慰具瞻之望顧惟衰朽早
屬知憐維與蒼黔同深慶抃

賀王樞使啟

熊子復

伏審渙揚大冊晉擢真儒二柄對持極隆稱於宥府萬

機獨運助英斷於嚴宸廟筭一新邇傳四出竊以聖常
求於宰輔時罕建於元樞慶厯之佐或銳於圖功則必
得杜正獻之矯亢皇祐之弼方權於濟務則亦有龐莊
敏之鎮浮如洪河春漲而砥柱不揺若碧漢夜闌而長
庚有耀皆正機廷之使號旋更宰路之官儀我思古人
復見今日恭惟樞使相公挺生曠代特立清朝渾渾無
涯道極聖門之遠堂堂不撓才充邦棟之隆方游華禁則
特達而徑遷及處峻廊則周旋而徧歷樞機周密既亮

采而日嚴輔贊彌縫每含章而時發氣塞兩儀而直養
無害智周庶彙而曲成不遺姑首贊於籌幘即平遠而
揆席某早窺崇仰晚托洪鈞固知弗為管晏之功將盡
行於所學況已屢陳堯舜之道尚親見於此時

賀虞樞使啟

耿元鼎

伏審貂璫趨道歷坤維萬里之長袞繡還朝陟乾道元
樞之貴眷威名之特盛加禮貌以惟隆斷由當宁之心
喜動在廷之色邊陲加肅廟社增榮竊以九重知人莫

難乎三事大夫之選五岳總務尤重乎六卿司馬之權
必有抱經緯之全才乃可注安危之兩意況人主職論
一相妙簡惟當軸之賢而天子守在四夷所覲獲偃戈
之慶苟非宿望曷副疇咨僉言我公傑立當世諒惟歡
慰恭以樞使相公先生勲高一代名震萬方容止可觀
所謂大臣者謀猷必告豈曰小補哉海揚英雋之躔自
結顯昂之睠取武成二三策志清中原得結輩十數公
天降大任擢自詞林之妙叅陪法從之華督府燃犀嘆

夷吾於江左留都典鑰仰蕭何於關中丹青旋憶於老
臣閭闔再朝於黃道至每為絳侯而目送謂不得皋陶
為己憂方欣要路之登已遂急流之退重輕所繫難稽
謝傳於東山安否何如即訪裴公於西雒召從綠野超
拜洪樞既夙夜以在公亦朝夕而納誨漢高決勝千里
獨子房參帷幄之謀舜帝有臣五人惟伯禹荷股肱之
託嗣聽絲言之出會觀鼎足之承永慰具瞻共觀爰立
某早登崇俛竊拜下風列屬憲臺聿密承於謦欬備員

帥幕更叨被於陶鎔當盛事之播聞欲中宵而起舞凡
骨念當家之鼠不隨鷄犬以昇天後時慙失旦之鷄方
効燕雀之賀屢如其欣悚莫究敷陳

賀虞樞使啟

孫正之

伏審上心圖舊中詔疏恩趨駕鋒車擢冠樞省豐財裕
國不在茲乎偃革安邊自今始矣恭惟某官千齡間出
一旦親逢富貴初非本心功名蓋其餘事明白洞達濁
涇貫清渭不可涅而緇碩大剛方長劍倚太行不待扶

而直璽書屢及門而躊躇四顧使軺促就道而俯樓三
辭道之將興歟當仁不讓天之未喪也舍我其誰勉應
側席之求亟正元樞之拜大安國步護諸將於爪牙之
雄遠憺王靈制百蠻為股掌之玩某空嗟大耋莫睹高
明比貢蕪詞獨蒙褒惜側聆誕告尤激懽悰東閣加招
顧已孤於榮願南山高仰猶獲預於遐瞻欣抃之私占
陳曷既

賀王樞使啟

馬子才

誕告明庭延登近弼運籌決勝久分疆場之憂當軸處
中遂正廟堂之位折衝雖舊注意唯新恭以某官稟氣
雄剛受材英特任心膂爪牙之寄積拚常鼎鼎之勲惟
文武以兼資故君臣而默契昨屬羽書之急親煩幕府
之行軍容一陳士氣百倍殄萬里憑陵之衆安兩淮震
擾之民累歲賢勞蟣虱幾生於甲冑一朝醲賞貂蟬果
出於堯登某早託餘光欣聞異數偶左府之拘綴阻東
閣之進趨暑令方新政塗多暇冀謹寢養之節用承疏

宸之休

賀徐樞使啟

李粹伯

光膺寵命入秉鴻樞廊廟自高有人豪之在位搢紳相
語喜君子之得時某官學通天人氣貫金石議論文章
動臻乎意表死生禍福不入於胸中兒曹知白日之清
明學者愧介丘之逸邈帝於裴度寄天下之安危人以
謝安卜國家之隆替果陪光輔實允具瞻某久辱誤知
欣聞休命屬守符之拘綴阻賓館之進趨詠頌徒深敷

陳罔既

賀秦樞使啟

汪彥章

顯膺綸綍峻陟機廷唯賢哲之奮庸實廟堂之增重庇
休所逮鼓舞攸均竊以北斗冠乎樞躔垂諸天象夏官
總乎兵政著彼國經當公朝閑暇之辰居右府近密之
地仰禋至治允屬英髦恭惟某官智畧淵深神丰岳聳
瑞聖時而間出鍾賢運以挺生較藝棘闈素號人中之
傑標名桂籍果先天下之儒爰簡清衷亟躋華貴掌書

秘府典禮奉常翰苑揮毫妙極辭章之選邇英進讀益
加體貌之隆緊經綸之宏才宜文武之兼用延登帷幄
式贊鈞衡方君臣慶千載之期而父子有同時之遇誠
為盛事實絕前聞某側聽郵音限居官守想熒煌之座
徒劇觀瞻託坤圻之鈞愈深踴躍永言頌詠曷罄編摩

賀王樞使啟

王介甫

璇璣上列齊七政以均和帝袞輔成欽四鄰之基命親
逢華旦允屬宗工恭惟某官興國忠純爽邦明哲對越

光華之旦居然文雅之宗簡在上心鬱為時棟雍容禁
闥嘗密贊於睿謀叅貳宰司多委成於治體奮庸甚盛
注意特隆屬恩誥之誕頒分鎮臨之重寄居留神甸為
表則於四方寵進樞庭當折衝於萬里聲教所暨慶抃率
同某俯念空疎夙叨存記綰縣章而祗役望君幄以勞
懷共聽吉音豈勝至願

賀富樞使啟

毛伯穎

伏審進圖舊德入正洪樞威動殊方慶交多士恭以某

官智周事表覺動民先卷舒兼文武之謀猷出處格古今之事業盡性之學濬游夏之淵源致主之功軼夔龍之軌躅謗讒並起而不失乎正夷險存更而愈見其賢召自江湖進陪軒陛仰迪光明之學密資弼亮之謨與其置諸勸講帟幄之間曷若登於折衝廟朝之上具瞻攸在睿眷弗違有韡棣華並調金鼎紹八元之逸駕冠二府於同時蓋惟不世之異人宜錫非常之殊寵益隆勲德永載彞常某猥以頑冥夙叨知遇沈痾疲瘵方甘

蓬艾之窮居顯渥便蕃增貢桑榆之暮景悵門墻之阻
遠跼殫寢以增勞忽聽名除果符輿頌奮起已疲之力
願効指蹤圖惟未報之恩更期畢命永言欣幸實倍等
夷

賀吳樞使啟

葛魯卿

恩霈中宸榮登四府朝廷增重寰宇交歡仰企宥密之司
實領幾微之務總理軍政緝熙帝猷鑒斗運而當樞佐
天討而尚武中資廟筭外濯王靈宜得真儒來副異選

非有經綸之望曷膺寤寐之求恭惟某官性稟朴誠學該微妙言為邦之興替身任道之汙隆文章百世之宗師風采三朝之元老千齡際會婉亮舜之君臣一體同榮陋機雲之兄弟優承睿眷密贊兵機即展秘於龍韜自收勲於麟閣國勢永依於柱石民心大庇於陶鎔暫執鴻權即登元宰某限拘文禁莫展慶儀徒埽舍人之門阻侍先生之席心同賀燕仰窺大廈之成志比躍金正倚洪鑪之造其為朴詠實倍等夷



五百家播芳大全文粹卷八

欽定四庫全書

集部

五百家摘芳大全文粹卷九

十

詳校官編修

臣謝振定

助教

臣常循覆勘

總校官編修

臣王燕緒

校對官中書

臣葉蘭

謄錄監生

臣王廷璧

欽定四庫全書

五百家播芳大全文粹卷九

宋 魏齊賢

葉 棻同輯

賀啟

大參

賀沈參政啟

汪彥章

光膺書贊入秉事樞朝廷無謀國之疑天下有得人之

慶音郵四達風采一新恭以某官碩學造微高文行遠
房喬警敏安危炯炯於胸中劉向精忠邪正惓惓於筆
下暫付維揚之治俄深宣室之思連趣鋒車遽叅魁柄
儒術果康於經濟善人斯得於統盟復七世祖宗之基
國須賢立極一時人物之選公為時生某久辱眷知欣
聞登用均茵憑之未尚託他年在陶冶之中敢忘今日
歲律晚晚巖廊靖深願為宗社以自持常有神明之來
相

賀李參政啟

張全真

伏審顯奉制函榮躋政路正人登用固知道之將行善
類傳聞殆欲喜而不寐恭惟叅政議高而慮深學博而
造微納忠不暇於謀身嫉惡蓋由於稟性鑪錘烈焰莫
摧百練之剛霜雪沍寒不改後凋之操堂堂侍從之老
赫赫蕃宣之勲凜難進之高風蔚具瞻之輿論公道既
闢天意乃回用汲黯於漢庭淮南自定見夷吾於晉室
江左何憂究觀宏規灼見興運唯是上尊隆於王德下

博採於真才內銷姦欺朋比之餘外戢跋扈飛揚之漸
裁抑奔競督責苟媮凡此數條諒闕深念某支離病骨
臃腫弃才謬託交承之私終慮責任之重蒙成矩矱固
無假於施為佚老江湖政有資於造化餘寒未艾機務
方繁益調茵鼎之宜佇正鈞衡之任區區欣頌實倍等
夷

賀翟參政啟

張文饒

伏審顯頌詔綍榮貳政機真賢舊庸寰海蒙福恭惟慶

慰伏以某官神姿英偉識量清夷學推四海之宗工德
茂三朝之元老再掛冠於神武尤高難繼之風兩待詔
於金鑾卒賴持顛之畧遂由公望入踐政塗論說無疑
沛若巨魚之縱壑姦邪不起凜若猛獸之在山坐制天
驕允資人傑亟贊元於鼎鉉竚紀績於旂常某蕭然衰
蹤託此巨蔭念備員於高密實陪賓客之餘茲假手於
會稽獲奉教條之舊未貽吏議殆非人謀除目播於邇
遐驩心倍於夷等計安宗社側聞幃幄之籌佚老山林

終借齒牙之論屬枸符竹阻造賓閤

賀曾參政啟

光膺制綽參秉政機帝曰往哉文武為萬邦之憲天其
或者太平當今日之期郵音四傳輿頌交慶恭惟某官
博大而氣正峻明而識高崇論閎議鏗鉤乎闕庭雄篇
大冊橫絕乎今古銀臺三昧聳廊廟之高風金帶萬釘
映山川之秀氣攘袂徇國秉羽投兵裴度躬往視師遂
決淮西之勝謝安晏處清寇果收淝水之功識乙陞之

履聲付上流之間制四從圭覲益峻巖瞻精神折十里
之衝兢業贊萬機之務有加眷注爰契疇咨惟茲四人
共迪文王之彝教式是百辟要觀山甫之令儀某內愧
迂疎仰崇知遇乞漿得酒適幸際於豐年點礫成金實
全資於良藥逖聞異數喜倍常倫陳泰階之六符莫觀
光耀轉洪鈞之一氣終賴陶成夏律清和政塗閒暇願
謹鼎茵之節永為宗社之休

賀楊參政啟

洪景伯

伏審延登帝賚叅秉國均大老既歸天下安往有德是
進朝廷益尊休聲不約而自同和氣非召而自至唯皇
家之建輔自乾德之官儀共領朝班纔差丞相之一等
通釐省務非特尚書之萬幾雖大政之咨未嘗乏其人
然真儒之用或有愧於古必成千一之遇如伊尹萊朱
見而知焉庶幾三五之隆雖管仲晏子不足為也恭惟
叅政心潛百聖氣塞二儀學者仰如泰山早擢南宮之
秀蒼生望為霖雨久期西蜀之來屬親攬於政機亟進

聯於法從佩龍淵之鳥既引上於星辰演鼇禁之綸更
助為於雲漢上方慕仁者交鄰而得湯文之道戒功臣
任職而全寇鄧之勲力彊百世之本支外定四方之綱
紀匪資耆德孰贊虞謨果躋宙亮之聯用究弼諧之業
如范丹陽權大謀於慶厯之際若王臨川持高論於熙
寧之初已素協於巖瞻宜即膺於柄用某逖將使指疎
聽制音但竊欣於得輿莫趨慶於成廈願契沉幾之運
益恢遠馭之圖

賀洪參政啟

熊子復

伏審簡隆嗣聖序陟宗工冢席方虛宜總廟堂之議邊
烽既息併顙幃幄之謀播告邇遐聳動觀聽竊以彌綸
大政一日至於萬幾體貌近司四岳均於百揆或偶虛
於袞職則獨決於廟謨是故韓安國長烏府而行天子
之權郭待舉貳鸞臺而典中書之務叅稽故實委任真
賢恭惟叅政樞密知院驚代鍾才際天蘊識學通流畧
而洞視萬古文類盤詰而勒成一家蚤擢異科游散華

貫膺堯舜父子之眷如彼其專較伊呂伯仲之優於斯
為盛鼇禁久資於視草鴻樞更藉於運籌果副民瞻進
叅國秉使已通於沙漠盜既掃於潢池清廟告功盡出
真儒之畧正衙宣制佇登元宰之班某猥冒使華尚需
官次遯聞成命喜陶冶之方新退省孤蹤覺帡幪之有
託

賀陳參政啟

孫逢辰

伏審誕膺顯冊進服邇僚帝賚良弼而挺生王佐之才

天降大任而叅秉國成之重茲一德明良之會實千齡
旦暮之逢恭以某官學洞天人精授之原德合文行樞
機之要踐揚茲久譽處深休肆疇論思潤色之工進陟
經體贊元之任儀刑四海出納萬微丕闡帝圖大釐邦采
迨茲期月早興王者必世之仁奚俟百年已著善人為邦
之效某門牆舊物猷畎餘生猥當三省起廢之初嘗玷
一諾游談之助逖聞休命爵躍固異常人之情竊仰高
風鳬趨莫陪下士之列

賀蔣參政啟

孫逢辰

伏審祇奉璽書進司國柄方賢路逢辰之日正聖心顯
俊之初揆羣策以圖勲大張天步進真儒之置輔卓冠
臣宗恭惟某官七葉忠孝之門四科文學之士一朝獨
步兩禁先登體聖人之清而使貪夫廉秉君子之剛而
使枉者直光被贊元之舉具宣扶世之猷自古稱君臣
千載遇合之難於今見祖宗五紀蟬聯之盛近繼元符
樞筦三事之列遠追東京山亭萬戶之封恭惟馬氏白

眉之良行踐王公黑頭之拜如某者年齡遲暮名迹湮
淪同鄉社纔數舍之遙在門牆無半面之素繫巨川之
舟楫何所不容而夏屋之帡幪固無弗獲側聆誕告尤
激歡悰曳鄒衍之裾無因至前著祖述之鞭忽焉在後
其為林躍周釐占陳

賀王參政啟

林子卿

顯對延揚登陪國論旒黈益勤於簡注簪裾聳企於儀
刑勢在本朝威宣遐域恭惟某官斯文所在以道而鳴

蘊誠明之學而本乎中庸操經綸之志而見於事業真
儒無與為敵屹然在諸公之前天子盡用其言擢之置
七人之上薦紆密睹進副師謀惟其當君子大有為之
時必能辦羣臣不可及之事師尹赫赫已具隆巖石之
瞻齊人章章將盡歸侵疆之舊倚席鈞衡之寵懋成彝
鼎之勲某辱在下風遠從漕役今得與諸生之列故喜
倍常人之情若曰知音政流水高山之際如其造化在
春風夏雨之中

賀蔣參政啟

晁子上

對揚宸綽榮貳政機進有道而朝廷尊姦邪敢侮得賢者而邦基立太平可期華夏罔不交歡士民率皆相賀竊以柄輔一象作斗極以建時泰階六符應文昌而辨位仰瞻乾度俯驗人謀蓋將參造化於陶鈞贊彌綸於天地唐宗圖任登庸首命於魏公藝祖用賢遴選特先於居正矧嗣王復古之際委吉甫作相之初易俗移風方冀脩明於教化施仁發政力圖安靖於寰區以至理

財用以濟中興明黜陟以勵庶尹考禮定樂折獄明刑自
非公選於賢良曷足叅知於機務博求羣彥果得巨人
恭惟某官挾經文緯武之才負聳壑昂霄之志道德純
備器宇端方玉樹瓊枝迴出風塵之表珠衡犀角允懷
冰雪之清其高識遠見足以發明於斯文其博物洽聞
足以考信於往古青雲得路搏九萬里之扶搖黑髮秉
釣盛一千齡之際遇頃從舊列浸歷華途飛騰省闈之
間參總樞機之要名既與身而俱顯德當偕位以兼隆

遂簡上心亟叅大政方覩絲綸之渙號已聞朝野之歸
心竚正台衡卽司槐鼎均調元氣永底丕平某跼促輶
駒翱翔蓬掖昔暫同於官守常獲款於歡娛茲聞進拜之
榮但切歡愉之至偶拘郡紱阻造賓閣緬想一堂共慶
風雲之會輒憑雙鯉聊伸燕雀之私

賀席參政啟

張全真

仰膺綸制入秉政機槐位久虛蓋簡求於宿望嚴瞻既
峻實大穆於師言欣圖任之得人知治安之有日竊以

車駕自南巡之後廟堂深北面之憂一人嘗膽而念寇
讐羣公借箸而決成敗閱時滋久至計未聞欲陵厲中
原而復土疆則敵勢尚強蓋懲車覆之戒欲逡巡江左
而聽天命則國威日損或有陵夷之憂當宁雖屢興嗟
盈庭莫執其咎豈中興之業難以連於得志而非常之
事未可輕以屬人故茲黃閣之開宜慰蒼生之望非時
英傑孰副倚毗恭惟參政厚德鎮浮大猷經遠想累朝
之故老綽有典刑閱當代之名流蔚為領袖雍容禁從

欽定四庫全書

五百家補考大全文粹
卷九

十

密勿中嘉果膺黼展之知擢贊鈞衡之任方當協成長策宏濟多艱力王室而復神州少快茂弘之志脩政事而整戎旅載賡山甫之章某比以病衰託於輝潤南臺冠豸早欣草木臭味之同西省賜環尤見松柏歲寒之操辱知固久歸老有期逖聞除命之頒切倍常情之喜

賀楊參政啟

張文饒

簡自宸衷參持相柄天降大任歷三朝而後興志在斯民委萬務而不厭絲綸誕布廊廟增崇竊惟同以為和

鄙夫昔以充位周而不比賢者今以致君當乾剛獨斷
之辰襲泰吉彙征之後羣枉絕去大公顯行有若君
陳十年而無拂庶幾丙魏一體以相成坐臻休功可謂
盛事恭惟某官學關治忽道貫隆汙早極羣書蔚為多
士之冠晚凝庶績雅屬萬民之瞻方自退於險微久自
全於明哲日月並照江湖來歸論思禁闥則諒直之志
宣潤色皇猷則灝噩之詞著當宁目以重器在廷仰其
達尊果由喉舌之司遂奉股肱之寄公權素行不數日

欽定四庫全書

五百家補考大全文粹
卷九

十一

以移風伯起名家當四世而載德某濫分外間方託洪
鈞簪橐同趨尚想金華之對搢紳相慶莫陪沙路之塵
永言傾瞻實倍等夷

賀錢參政啟

張文饒

伏審寵頒命冊褒進宗工陪鉉席之贊元官儀既正併
機庭之經武國勢增隆朝野交歡華夏咸賴竊以文武
二柄並用惟允明良一體相須乃成匪惟內穆于師寮
兼欲外疆于戎索恭惟叅政樞密知院曠代充才際天

蘊識發蹤指示嘗顓幕府之權謨明弼諧方贊廟堂之
畫師干所指騎璫俄清宜應泰階之六符纔差丞相之
一等昔天聖內翰竟不陞二府之聯而乾興元樞未嘗
預三省之政茲已光於先正矧即拜於上台由階而升
可拱以俟某夙叨臨遣行即代還上策禦戎將見五兵
之戢大鈞播物尚霑四牡之來

賀王參政啟

熊子復

伏審輟營邊瑣擢贊廟謨長爭臣之七人久隆上眷差

丞相之一等進繫民瞻體貌方新堂廡增重竊以河北甫定畢文簡遂叅於政機陝西畧平龐莊敏或貳於國秉茲本朝之盛事皆當代之偉人經營雖見於長才論諫未聞於大節求之先正無若范公明道立朝罄危言而悟主慶厯奉使攄妙畧以禦戎及一朝寵進之崇故四海恨用之晚曠古今而僅有邈前後以相望恭惟叅政直道議朝遠猷經世夙被光堯之眷薦膺分陝之權班既列於從塗簡益堅於嗣聖叅華計省無錢穀之問

至廟堂振藻詞林有書札之文賜方國逮甄流品更總
銓曹旋陞正諫之聯出護安邊之帥內清朝序姦邪讒
佞欺負皆已除外壯軍容鄣戍鎮守干戈果自治亟垂
睿想還翊化鈞方今使雖遣而威靈未宣敵尚窺而要
領未得雖和親征伐但歸兩科而輔贊彌縫要藏諸用
願進顯於魁柄用光啟於洪圖某畏戒輕輶阻趨崇仞
仰窺勝算喜根本之既強退省孤蹤覺帡幪之有託

賀洪參政啟

鄭日丙

光奉制書進陪國論樞庭獨步方承晝日三接之光政
路同寅已動泰階六符之色人心闔懌海宇清明恭惟
某官靜和而粹夷宏深而簡遠度量包世山負海涵道
德照人日光玉潔爰膺妙柬出應昌期正謀邊瑣之虞
果預使羶之選深為國計帳三表五餌之不施逆料敵
情知十餅九漿之可下用權活法密贊沉幾大計定而
主聽不搖佳兵寢而民生自厚惟其純用詩書之力所
以優為道德之彊既得其人宜委以國稽治道之極致

必在華夏蠻貊之舉安考仕塗之甚榮罕見父子兄弟
之迭起邊陲靜謐門宇熒煌自非內政理而外患寧何
以身美名而君顯號旂常有紀天地無窮某竊伏冗僚
欣聞異數屬宣帝綜核庶政常憂稱職之未能若周公
阜成兆民願繼考工而有作

賀施參政啟

任子方

眷求舊德允諧選衆之公叅預政機式賴同心之助側
聞休命倍集懼悚竊以六符位於泰階正應公台之象

四輔拱於北極亦分政弼之司蓋機務之浩繁緊謀謨之協濟必有恢廓老成之士共圖光明俊偉之功用簡清衷宜歸雅望恭惟某官道躋民極業總天常沉毅剛方有東都之氣節溫恭忠厚擅西漢之文章入踐華聯益騰茂實總銓衡之選授咸仰題評贊鈞軸之陶甄果諧登進必將盡行其所學遂以大慰於斯民增賁昌期茂隆遠業某孤蹤不振弱植無依假手縉雲曾賴告新之益遡風蜀道欣聞圖舊之良慶竭未遑瞻依再劇

知樞

賀葉知院啟

晁之道

伏審外奏膚功中疏顯渥乃眷樞機之元德夙資幃幄
之深謀宜腴褒章用光成績惟聖賢之會遇極簡策之
尊榮慶動搢紳威加中外恭惟樞密知院師表當世彌
亮熙朝發揮孔孟之精微振起臯夔之事業內昭王度
百志所以惟熙外暢天聲九鼎為之增重惟渥中之新
境實隴右之故封物產夥繁地居險阨武帝遂通三十

欽定四庫全書

五百家補芳大全文粹
卷九

十五

六國之遠素號喉襟充國請糴數百萬斛於茲可知沃壤歷代守之以制虜名將由是而折衝神考御天不忘恢復泰陵繼志乃克綏懷紛異意以中更舉成功而外棄神贊安邊之策人懷面內之心載軫淵衷式資碩輔灼見萬全之策亟收一舉之功壺漿在塗牛馬布野民情實歸於縱壑兵勢益易於建瓴用能旬月之間盡覆犬羊之衆近觀鄯部已知係頸之期旁瞰夏巢無復游魂之計再收妙畧增賁昌期宜薦錫於寵光用益昭於

賢業某夙承異寵久負空殮乘障荷戈不預虎貔之列
策勲飲至莫陪鴛鴦之羣側聽詔除阻脩賓謁雖慙弱
植倍極懼悚

賀汪知院啟

熊子復

伏審趣還舊弼寵正元樞單于叩五原方舉衣裳之賜
子房冠三傑允顙帷幄之籌魁柄有歸巖廊增重竊以
儒用真馬得削則制挺可撻夫甲兵士遭變不知宜則
解圍空舞夫干戚是故有富文忠之遠畧而契丹之和

乃定有寵莊敏之長算而元昊之款遂堅皆決勝於機
廷繼登庸於揆席玩四夷猶兒戲爾曷敢不來想二公
若聖人然詎容專美恭惟樞密知院學闕百聖道契兩
朝長御史以視師夙定禦戎之策叅天子而議政亟恢
經世之圖中雖迫於流言上愈隆於注意起司管籥兼
蒙福於京師入覲冕旒果基命於宥密既首本兵之重
仍虛元宰之尊異域申盟聊用疆於戎索正衙宣制佇
遂秉於國鈞某猥使遠方喜聞新命帝王之興建輔弼

實有賴於共功國家之暇明政刑要不忘於自治願彌縫而藏用副垂拱而仰成

賀虞知院啟

宋仲山

伏審誕敷綸制入典樞機幃幄莫重於本兵謀謨必資於緯武威加夷夏慶動搢紳恭惟樞密知院器識光時才猷適變道德之學洞照於幾微忠諫之風聳聞於朝野中罹讒謗旋陟邃嚴居多入告之嘉謀益挺不回之勁節果符輿頌進服巖廊深觀奇偉之功增賁明昌之運

某久塵委使素辱知憐云云

賀虞知院啟

洪景玉

伏審帝懷舊弼國拜元樞乾坤清夷久息干戈之役夙
夜宥宥首當幃幄之籌播告邇遐竦動觀聽竊以交隣
有道本聖主之洪謨制勝無形賴真儒之奇策矧是機
庭之長實均揆席之尊方嗣皇獨運於朝綱非耆哲孰
專於廟算恭惟樞密知院道關百聖功蓋兩朝持正論
如執玉之堅斷大謀若轉圜之易即江中而破敵勝謝

玄淝水之勲臨漢上以總戎過羊祜峴山之績逮進陪
於鈞軸仍兼運於韜鈴果致要荒再尋盟誓方具瞻於
巖石俄勇退於急流亟興丹宸之思復佐清朝之治暫
本兵柄績成偃伯之休旋秉國均茂建格天之業某猥
乘輶傳逖望泰符茲聞成命之頒實倍常情之喜萬間
廣厦幸已庇於帡幪一氣洪鈞願永陶於垓圉

樞貳

賀富副樞啟

孫仲益

茂膺帝訓進貳樞庭既登奕世之賢益重本兵之地恭
惟某官挺祖風烈為世英傑久隆依國之謀實副象賢
之意氣折強敵惟先正茂鼎彛之勲志在安邦資沉機
運幃幄之議繼家聲之烜赫極國步之艱難是宜宥密
之機鈴以靖殊鄰之倣擾某謬膺郡寄欣覩綸言三幅
八行曷罄書詞之悃九州四海用慶朝廷之尊

賀王副樞啟

孫仲益

伏審帝夢發祥上心虛竚誕膺顯冊進貳中樞竊以章

句之儒類優柔而不武介冑之士亦椎鈍而少文蓋藝之至不兩能唯天所賦有偏得惟是文武憲邦之任實符宥密基命之求端委一堂折衝萬里論兵投筆之後賦詩橫槩之間制挺捷強秦之兵請纓繫單于之頸用宣威於道德式注意於安危恭惟樞密躬不世出之才佐大有為之治論詩書於馬上方草奏篇得頗牧於禁中遂司密命盡古今不可兼之美值聖賢所難遇之時廷號初傳巖瞻惟允猷未形之難坐籌玉帳之奇建非常

之功行竚衮衣之拜某聞命而喜固異常情受知之深
實契榮願致小夫竿牘之禮或以為煩懷大臣教載之
恩不能自己

賀鄧副樞啟

晁之道

伏審光被宸綸榮叅樞柄聖神圖治痛宗社之多艱賢
哲奮庸覺朝廷之增重恭惟某官天資高邁風度粹夷
學擅名家極羣書之浩博文高華國掩衆作之深醇早
冠英躔荐更劇任嘉謀偉器進當旒宸之咨素履清名

允協簪紳之論果膺妙東遂贊洪機端委廟堂而為準
於百僚已歸重望運籌帷幄而決勝於千里竚紀殊勳
某頃獲接於清規茲復依於巨蔭行借游談之助俾從
佚老之歸草木亦知威名會見折筮以制羌夷之命黍
稷以供餘稅固將擊壤以追田父之歌屬拘職以印章
敢投誠於竿牘方隆倚注益輔粹和

賀林副樞啟

范西叔

伏審顯拜宸恩叅陪機柄惟是本兵之地必資同德之

良凡與交從尤深慰愜恭惟某官秉心直亮道脉淵源
學造古人之全名收天下之重蜚聲於閩海懋績於熙
朝歷典藩要漸躋禁林選掄初自於先朝圖任益隆於
嗣聖矧中樞之宥密首近位之論思文武道同仰助璿
璣之運雨暘時若共臻玉燭之和某素接班聯久欽德
誼不獨士林之屬望固惟朝家之得賢懽欣之誠悃悞
難叙

賀將副樞啟

誕敷明命擢貳鴻樞世稔服於重名人共欣於顯拜恭
惟某官才高康濟志切經綸文章秀發於妙齡器業養
成於晚節中外薦更之久所守益完縱橫應變之材無
施不可出為頗收入則卿雲先帝深知欲大用而未果
嗣皇優眷遂圖任而無疑召還自外而歸直禁林曾未
閱時而延登右府叅裁機政寧收邦猷朝廷取決於坐
籌邊鄙折衝於燕俎君臣千載孰窺造膝之謀冠帶百
蠻行見止戈之武某側聞除目阻遠鈞嚴莫伸賀厦之

私永愧登門之奮

賀趙副樞啟

秦少游

光膺眷命進貳鴻樞伏惟慶慰恭以某官器猷宏博學
術精微卓識照於未然竒節見於已試犯顏逆耳屢輸
汲黯之忠別嫌明疑力折董宏之妄進退周旋而可度
艱難險阻而不渝俄被召以旋歸遽干霄而直上粵自
卿曹之貳進陪樞筦之崇郎音播騰士論欣快亟聞趙
武越四等以將上軍行見千秋以一言而取宰相某叨

分符節

云

賀沈副樞啟

許次思

宸綸播命宥地登賢巖廟益尊增渙斗牛之野蠻夷震
疊懽騰貔虎之師凡蒞託休孰不鼓舞某官才高經緯
識造幾微傳聖人之道而期於力行通當世之務而以
為己任無虬蟬蟻子之援歷鈞天帝所之遊貳事省聯
制邦材於強富修詞史館納王法於婉微成績炳然聲
名藉甚以文武兼資之器會君臣一德之符爰進貳於

國樞遂密叅於廟筭方聖主大有為之日實上臣恢遠
畧之秋必將衆建時髦兼收羣策指蹤諸將坐成第一
之功紀石燕然共際半千之運即正金甌之拜永調玉
燭之和某乘部無堪登門有舊馳心大厦莫攄燕雀之
私投翼深林庶遂鷦鷯之託

賀陳同知啟

伏審輟總銓平擢躋樞近邊烽久息益恢宥密之圖宰
府初開併贊經綸之務郵傳四出廟論一新竊以帝王

輔弼之臣要須並建文武弛張之道允屬兼資方顯戎
索之疆更貳國鈞之秉卓為異數併授真賢恭惟樞密
同知叅政氣勁而量宏體充而韻粹榜登龍虎甲四海
之諸儒履上星辰冠六聯之常伯況長策早施於邊瑣
而遠圖密契於宸旒朝廷推德業之尊將帥仰威名之
重果膺命冊進筦事樞舜有五臣伯益贊舞干之化漢
有三傑子房專籌幄之功屬綜核於羣工兼彌縫於庶
政叅百揆四岳之列既任弼諧應三台六符之躔佇當

變理某叨居省闈獲備官僚茲乘新渥之除實倍羣情之喜仰窺妙筭諒開闔之難名退省孤蹤覺悵懷之有託

賀劉同知啟

伏審簡自九宸柄於二府摛文內禁久已豫於密謀讚武中樞進遂當於大任郵傳四出廟筭一新竊以舞干戚而解圍蓋無是理籌帷幄而決勝必有當才矧叅翊於神機宜妙疇於邦傑若章文簡拜於景祐之際如吳

正肅命於慶厯之間進皆自於鑾坡秀仍鍾於建水雖
今僅見振古罕聞恭惟樞密同知道際兩朝功傳三世
得鼇禁之頗牧須殿藩宣赴鳳沼之夔龍復躋華要果
顯兵柄遂陟政塗總攬權綱事雖由於獨斷運動樞極
時正賴於同寅某幸託餘輝欣傳異渥道古今而與聖
德敢効私諛進英雋以強本朝願符衆望

賀林同知啟

劉子駒

伏審光膺制命榮贊樞庭凡被鈞陶卒同鼓舞恭惟某

官嘉謀經國粹行表時文章究六藝之淵源聞望聳一朝之風采貫古問學該今典常依日月之光華乘雲龍之亨會國是既定民瞻益深果由喉舌之司進陟樞機之任綏禦每資於長算猷為豈屑於近功金石著勳彝常紀德聊居右府即踐中台某辱知己之既深輒忘言而申序方棲仁蔭徒深燕賀之誠莫展慶儀不預鳬趨之列載惟抃詠曷既敷宣

賀葉同知啟

伏審對揚休命入秉事樞聖主御圖撫九五中興之運
大賢命世偕二三同德之臣廷渙甫傳巖瞻惟允恭惟
樞密同知訏謨經遠雅量鎮浮好直有叔向之言養氣
得孟軻之勇嬰龍鱗而守正獨懷蹇蹇之忠冠豸角而
觸邪詎作容容之計萬夫之望想聞於風采一國之慕
具載於歌謠果膺帝輔之求式受本兵之寄經術之士
進而名器重道德之威立而朝廷尊天子守四夷正樞
筦運籌之日人主論一相示鈞衡爰立之期某分違二

紀之餘追惟一日之雅側聆大用倍激歡悰繫四方人物之英舉欣欣起執鞭之慕而一老門牆之舊已駸駸向填壑之時俯深賀燕之私徒有羨魚之嘆

賀張同知啓

寵膺策制擢貳樞庭國之將興眷直臣之在位人惟求舊登元老以壯猷四方傳聞九鼎增重恭惟某官擎天柱石許國著龜吾道以為指南斯文之所寄命備更天下之故自結人主之知頃登要津即契真宰會公孫方

貴用事故長孺不得久留挺寒松之姿而晚操彌堅馥
秋蘭之馨而久幽不改惟睿后闢簡賢之路而清朝無
嫉能之臣起我公齟齬未合之中攄士夫鬱結不平之
氣謂東宮之位宜早定尚何待周昌之爭以累朝之君
不欲言遂固有魏謩之請雖咫尺被黜旒之寵然毫釐
輕軒冕之榮丹墀暫綴於咨諏琳館旋便於閒燕屬重
明之麗正圖耆德以弼諧首煩留鑰之司遽下詔環之
賜運機軸於九重密贊坐帷幄而萬里折衝外朝衣冠

覩絲綸而相賀窮途鱗甲先七箸以自驚亟登泰階兩
兩之符大慰維石巖巖之望某身縻遠嶠迹託洪鈞聆
成命之載揚知中興之可俟德尊黃髮當遂策尚父元
勲身伴赤松未許學留侯故事

五百家播芳大全文粹卷九